

Yu Xa'aqxt'iyunu' Karta yu Ts'oqlhi ni Pedro

Ni Pedro jamastak'ay yu talhakapu'an Jesucristo

¹ Kit'in kSimón Pedro, ix'oqxtamati Jesucristo y vachu' ixtamalaqachan kunita. Klats'oqniyau ni uxiknan yu lhak'ap'up'inat'ik yu ayaj xtapal, vachu va chun tacha kijnan. Chuncha val porke Jesucristo yu kiDiosk'an y kiJamalaqtaxtunuk'an va si ox makay axtoqnu'.

² Ayaj katamapaynin ni Dios y oxamaktaun katamakan por misp'ayat'ik ni Dios ali Jesús kiJalhachimo'onuk'an.

Tas kataputsukul ixlapapanakni Jesucristo

³ Kun ixtap'asta ni Dios kintaxtaqnin tachun yu maqsk'iniyau la ketsukuntik'an para lay kato'oyau. Chuncha val por mispau ni Dios yu kintajunta'in por ayaj ox junita.

⁴ Por ix'oxixtu kintajunin ni kintamakaniyan yu laj'ay axtoqnu' yu ayaj xtapal para chuncha mimputsukuk'an kaval tacha ixputsuku ni Dios. Ex chuncha lay kalaj'osmaj'ant'ik axtoqnu' yu mami'oniy metsukuntik'an, axtoqnu'yu alin lakanmunukpa' por ayaj talakanajun katamakal.

⁵ Xlihyucha jantu vamun lhak'ap'up'inat'ik, vachu' k'at'ap'asnit'ik para ox kat'i'ukxunt'ayat'ik. Ox kat'i'ukxunt'ayat'ik kun jatapastak'ati.

6 K'alhits'uk'ut'ik jatapastak'ati, vachu' ox k'alhist'akk'ant'ik. Ox kalhist'akk'ant'ik kun maqantaaulati. K'ama'ant'aulat'ik, vachu' kat'o'oyat'ik ni Dios.

7 Kat'o'oyat'ik ni Dios y vachu' k'alamap'aynit'ik tacha t'alaqaunin. K'alamap'aynit'ik kun japaxkanti.

8 Incha tachun yu aniy alin la metsukuntik'an y apalay talhavay ex jantu vali'iy kuna' metsukuntik'an. Vachu kaxajtachal yu ox por misp'ayat'ik Jesucristo kiJalhachimo'onuk'an.

9 Pero ta'ayu' yu jantu chun katijuntayal, yucha lhi'akxajachal tacha taun la'ach'ix yu jantu maqati lakacha'an. Va lajkaukmaj'an ni ixmalaqmixinikantacha ixtalaqalhin yu p'unaj ixmakay.

10 Xliyucha, ket'alaqaunin, k'at'ap'asnit'ik para chuncha k'a'ukxunt'ayat'ik. Ex lay kak'ats'at'ik ni tajunta'itan y talaksaktan ni Dios. Incha chuncha mak'ayat'ik ex jantu aqtaun k'amak'aunt'ijlayapitik.

11 Ex chuncha ayaj ox laqa achati kala'a'ik'anapitik ta'an jantu aqtaun mi'ojoy ixjalhachimo'on Jesucristo, yucha kiJalhachimo'onuk'an y kiJamalaqtaxtunuk'an.

12 Xliyucha klataylhaanau mapastakninin tachun yu aniy mas k'ats'ayat'ikcha y t'aylhip'inat'ik kun ni chivinti yu laqsaaval, yu lanit'ik.

13 Kit'in klhilay tejkan vananaj ikt'ajun va kim-paxtoqniy kaklamapastaknichoqoo ni aniy.

14 Ijk'atsay niman kakniya'. Va chuncha kijunil kiJalhachimo'onuk'an Jesucristo.

15 Kakmakaya' laqatap'asta para lay kap'ast'ak'alhit'ik yu aniy tejkan kakniya'.

Yu talaqts'il ix'ayaxtu ni Jesucristo

16 Klamasuniu ixtap'asta ni Jesucristo, vachu klamasuniu va kaminchoqoya'. Jantu vali'iy kuentos kaval yu lajk'us jamakanti. Kijnan va laqsaval klaqts'iu ix'ayaxtu la kintalakavantik'an.

17 Klaqts'iu tejkan kimPay Diosk'an ay makal, tus t'oqx ixlakatunkujunta. Va qasmakkal taun chivinti yu minchal kun yu ox ayaxtu ni Dios, va naunkal: "Yucha yu aniy ni kes'at'a yu k'achaniy, va klhi'achantajuy por yucha."

18 Kijnank'an ijgasmakvi ni anchanu chivinti yu minchal tus lakt'iyan. Va ch'antaun xaktayanau ni laka aspajun ta'an ix'alinta Dios.

19 Chuncha apalay k'atsayau ni laqsaval chuncha val ixchivintik'an yu maqancha ixtalaqpute'ey ixchivinti Dios. Yucha maqsk'iniy kamak'at'ik kuenta, va tacha taun maklku yu mapulkuy laka puts'isni' tus katunkulcha. K'alhi'ach'ant'a'ut'ik tacha katasul la melhanutk'an yu ay jast'aku yu xajachil puvakuj.

20 P'unaj maqsk'iniy ox kak'ats'at'ik ni jantu matichun lay kanaul ix'aman yu naunputun ix-chivinti Dios yu maqancha ts'oqkanta.

21 Ixchivinti Dios yu ixlakqpute'ekan maqancha jantu kaminchal kun yu vali'iy lapanaki. Lapanakni yu vamun Dios ixtatapatsaniy, yu'uncha ixtalaqpute'ey yu ixlakmasuniy ni Espíritu Santo.

2

*Yu tamasuy jalaklkanti
(Judas 4-13)*

¹ Maqancha xalapanakni Israel ixta'alin lati lapanakni yu jantu vas ixtalaqpute'ey ixchivinti Dios. Vachu chun ka'alina' lati kun uxiknan yu jantu vas katamalaniyan. Katamanuniyan chivinti yu katalakt'ilhiyan. Katamakauntijlaya' ni Jesús yu jalaqmalaqtaxtul y chuncha katapaxtoqniyan para ts'alaj kala'a'it'ik maqanlqajnati.

² Katamakaya' axtoqnu' yu jantu laj'oxi, ex lati katalaqts'i'iya' makanan tacha yu'uncha. Ex alati lapanakni katalaktu'uya' yu laqsalval ox tin.

³ Por ix'akcha'atk'an katamaxtuniyan mintumink'an tejkan katamasuniyan chivinti yu jalaklkanti. Tus la maqancha, yu'uncha jalhipakxa'ikanta maqanlqajnati y chavay jantu kataqmaqaya'.

⁴ Dios jantu kamalaqmixinil ni ixmayulnin yu maqancha tamagaqtaqalhinil. Va jalaklhilha'al tus laqnin ta'an jalakmakaül tach'inin laka puts'isni'. Va naul ni ancha katataulal tus tejkan kalakmuk'aniya' ixmaqanlqajnatk'an.

⁵ Vachu jantu kamalaqmixinil ni lapanakni yu maqancha ix'alin lakamunukpa'. Va malaqachal xkan tus aqlama'ol ni lakamunukpa', tats'anqa'ol yu jantu ixtato'oyay Dios. Maxajnichal vamun Noé yu Dios ox ixlaqts'in kun pumatujun alati lapanakni.

⁶ Vachu' jalakmuk'anil ixlaqtaqalk'an ni lapanakni yu ixtavilanl laka putaulan Gomorra kun Sodoma. Ixputaulank'an jalaqxava'ol tus

lk'ak'a val para katamakal kuenta yu alati lapanakni yu jantu tato'oyay Dios.

⁷ Dios vachu' maxajnichal ni Lot, va ox ixlaqts'in. Lot ayaj lhitamaqanchapul ixtalaqalhink'an ni anchanu laktu'unun lapanakni.

⁸ Ni Lot va ox lapanaki. Tus ayaj ixsaniy la ixjalhanuti por lhilhiy ixjalaqts'in y ixqasmat'a ni axtoqnu' yu ixtamakay.

⁹ Ex ni lapanakni yu chuncha tato'oyay Dios, ni Dios k'atsay tacha japu'aqtayjuy tejkan la lhita'ay la ixjatsukuntik'an. Vachu ni lapanakni yu tamaqtaqalhinin, jalaklhit'ajun kun maqan-lqajnati tus tejkan kalakachana' ni julchan tejkan kalakmuk'aniya' ixlaqtaqalk'an.

¹⁰ Apalay p'as kalaqmamaqanlqajnivaya' ni lapanakni yu ayaj tamakay yu tamakaputun la ixlakatunajk'an. Vachu' talaktu'uy yu talhit'ajun lhachimo'on. Yu'uncha va ta'ayajnan, vachu' laj'ay tak'atsan. Jantu tatalhanan ni katalaktanchanil yu talhit'ajun tap'asta lakt'iyan.

¹¹ Pero yu ixmayulnin Dios, mas ayaj talhit'ajun tap'asta ali lhachimo'on, jantu tachivintanuniy ni Dios para kalakmuk'anil ixlaqtaqalk'an yu alati.

¹² Pero ni anchanu vali'iy lapanakni, yu'uncha talhichiviniy axtoqnu' yu jantu tamalaqasiy. Va laktontos talhitsukuti yu tats'anqaniy jatapas-tak'ati. Va tatsukul para kalakch'apakal y kalaq-maqnikal y vachu va chun tacha talhitsukuti kataniya'.

¹³ Kalaklhimapalkana' maqanlqajnati tacha ixhilhajatk'an yu tamaqtaqalhinin. Ayaj talhi'achantajuy ixmakaka axtoqnu' laqtaqal mas

kaval laka tunkuna!. Vachu ta'an mak'ayat'ik milakvaytik'an, ancha tamakay axtoqnu' lhitanamaxanin yu tamaqamay. Va ch'antaun tavajin kun uxiknan.

¹⁴ La ixlakavantik'an vamun tapastak'a katat'atamal yu jantu ixnavink'an kaval, jantu tamakajun ixtalaqalhink'an. Tamakanuy lapanakni yu jantuka' ox talhakapu'an para katamakal laqtaqal. Yu'uncha ayaj talhit'ajun akcha'ati. Tatauk'aniyachal maqanlqajnati.

¹⁵ Tamakauntijjal yu vas tin, tapatanul la ixtin ni Balaam yu ists'al Bosor. Yucha maqamal kapulhajal tumin por yu laqtaqal

¹⁶ pero ox laq'aymakal. Yu ixburro, mas jantu lay ixchiviniy, va chivinil tacha chiviniy lapanaki. Va laq'aymal para jantu kamakal tacha qayntaun lokoj yu Balaam.

¹⁷ Ni anchanu lapanakni jantu matichun lay ta'aqtayjuy, va tacha lakxkan yu xixta. Va tacha taputs'i yu sunlha'an ni un pero jantu tamay xkan. Tapaxtoqniy kalaklha'ankal ta'an t'alaj puts'ista mas va tavanancha.

¹⁸ P'ays tachiviniy kun laj'ay chivinti yu jantu tu'uchun xtapol kaval. Talakmakanuy lapanakni yu va aniyka' talajqosmaj'anta yu talaqalhin. Tapumakanuy axtoqnu' yu tanajun katamakal la ixlakatunajk'an.

¹⁹ Tanajun ni lay k'amak'at'i yu k'amak'ap'ut'u pero jantu laqsalval kaval. Yu'uncha va xa'oqxtamatin yu talaqalhin. Mas va ta'ayucha kaval, va si alin yu laklhichimo'oy la ixjatsukuntik'an.

²⁰ Tamispal ni Jesucristo kiJalhachimo'onuk'an

yu kintamalaqtaxtun. Chuncha talajqosmaj'al xatalaqalhin aniy lakamunukpa', ex astan tamakauntijlachoqol. Yu talaqalhin junchoqol tacha ix'ukxtink'an. Chavay apalay lhita'ay para yu'uncha xajantu tejkan jantuka' ixtamispay Jesucristo.

²¹ Apalay ox ixval incha jantu aqtaun ixtamispal yu lakatin yu Dios ox laqts'in. Va ixlaqlaqpute'enikantacha yu Ihinajun Dios pero astan tamakauntijlachoqol.

²² Kun yu'uncha laqsaval chuncha val ni chivinti yu najun: "Laqataun x'oy anchoqoy una' ixpat'ati. Laqataun p'ax, incha ox kap'axat'i, anchoqoy p'axni laqqa pul'amun."

3

Kaminchoqoya' ni Jesucristo

¹ Uxiknank'an yu klapaxkayau, aqtauncha klats'oqnii y chavaycha aaqtauncha klats'oqnichoqoyau. Va klaxtaqniyau jatapastak'ati, para ox kap'ast'akch'o'ot'ik

² yu ixtanajun ni lapanakni yu maqancha ixatalaqpute'ey ixchivinti Dios. Vachu kap'ast'akch'o'ot'ik yu Ihinaul ni Jesucristo yu kijalhachimo'onuk'an y kijamalaqtaxtunuk'an. Yucha tajunchoqon ni lapanakni yu jalaqmalaqachal.

³ P'unaj maqsk'iniy kak'ats'at'ik tejkan va laycha kami'ol ni lakamunukpa', ka'alina' lapanakni yu katamakaya' yu yu'uncha tamakaputun. Kata-laktanchaya' yu ox chivinti.

4 Katanauna': "Yucha naul ni kaminchoqoya' pero, ¿tisuncha tapasaycha? Jantu aqtaun minchoqoy. Kepayank'an tanitacha y tus va maqancha tejkan aqtaynil ni lakamunukpa' va tacha taylha'antacha."

5 Pero yu'uncha jantu tamakaputun kuenta yu inchine'. La maqancha ni lakamunukpa' kun lakt'iyan va ixchivinti Dios pu'alil. Ni lakat'un va xajchal xlhi'akpu' ni xkan, va xkan putsukuy yu alin lakat'un.

6 Va xkan pulaqmixlhi ni anchanu lakamunukpa' tejkan aqlama'ol lakat'un.

7 Vachu kun anchanu' ixchivinti Dios, ni lakt'iyan ali lakamunukpa' yu chavaycha alin va lhilkama'akanta para katalaqmixlhi. Katalaqmixa' kun jikmi tejkan kalaqchaana' ni anchanu julchan. Ex kalakmuk'anikana' ixlaqtaqalk'an ni lapanakni kun ixmaqanlqajnatk'an.

8 Uxiknan yu klapaxkayau, jantu kak'aukt'ik yu aniy. Ni Jalhachimo'onu' Dios makay taun julchan va tacha taun mil jach'itin y taun mil jach'itin va tacha paqtaun makay.

9 Ni Jalhachimo'onu Dios jantu taqmaqay para kamakal yu naul kamakaya', mas lati talhilay chun taqmaqay. Yucha jantu najun matichun kats'anqal, xlhiyucha va maqant'aqniy kun kijnan. Va najun tachun katamapaxal ixjatapas-tak'atk'an.

10 Jantu matichun k'atsay tavanancha kaminchoqoya' ni Jalhachimo'onu', vachu chun tacha jantu matichun k'atsay tavanancha kamina' qayntaun alhavana' laka puts'isni'. Ni lakt'iyan va tus p'ays qolun kamakat'auna' ex kami'oya'.

Tapuchux kalaqxau'oya'. Ni lakat'un kun tachun
yu ancha lakkakanta kalaqmixa' kun jikmi.

11 Ex chuncha tachun kalaqmix'oya', xlhiyucha
uxiknan ayaj maqsk'iniy kat'i'ukxunt'ayat'ik
tacha ixlapapanakni Dios yu ox tato'oyay.

12 Kap'akxan'it'ik ni julchan tejkan
kaminchoqoya' Dios. Kalhilaqlt'ap'ats'at'ik para
apalay ts'alaj kamil. Anchana' julchan ni lakt'ian
kalaqmixa' kun jikmi. P'ays kats'asa', tus tachun
axtoqnu' kalaqxt'aj'oya'.

13 Pero kijnan k'atsayau yu Dios naul
kamakaya'. Xlhiyucha pakxan'itau taun sast'i
lakt'ian kun sast'i lakamunukpa'. Anchana'
ka'alina' vamun yu Dios ox laqts'in.

14 Xlhiyucha, ni uxiknan yu klapaxkayau
yu p'akxan'iyat'ik ni anchana' julchan,
kat'amaqxt'aqt'ik ni jantu k'alhits'uk'ut'ik
talaqalhin. Jantu ka'alil milaqtaqalk'an para
oxamaktaun kat'i'ukxunt'ayat'ik anchana'
julchan.

15 K'amak'at'ik kuenta ni kiJalhachimo'onuk'an
maqantaulay para lay k'alaqt'axt'ut'ik. Ni Pablo
kint'alaqajunk'an yu paxkayau, yucha vachu
va chuncha tats'oqnin kun ixjatapastak'ati yu
xtaqnil Dios.

16 Chuncha najun kun tachun ixfkartas yu
ts'oqlhi. Anchana' alin chivinti yu lhita'ay
para k'amala'asit'i. Alin lapanakni yu jantu
ox talakpastaknan y jantuka' ox talhakapu'an.
Yu'uncha jantu vas tamasichoqoy yu ts'oqlhi
ni Pablo, vachu jantu vas tamasuy yu alati
ixchivinti Dios. Chuncha tamaxajniyachal
ixmaqanlqajnatk'an.

17 Ni uxiknan yu klapaxkayau, va k'ats'ayat'ikcha tachun yu aniy. Xlhiyucha k'alhist'akk'ant'ik para jantu katamakanun kun ixchivintik'an ni lapanakni yu jantu tatalhauny ixhachimo'on Dios. Jantu k'alhit'amak'aunt'ik ta'an ox alint'at'ik kun Dios.

18 Kat'aylhip'int'ik la ixjapaxkanti kiJal-hachimo'onuk'an y kiJamalaqtaxtunuk'an Jesucristo. Kat'aylhip'int'ik mispanan ni yucha. Yucha ay kamakakal mas va chavaycha y mas va tavanancha. Chuncha kavalcha.

**Ixchivinti Dios: ni sast'i chivinti yu Dios
jat'atamakaul ixlapanakni laka Ihimasipijni
New Testament in Tepehua, Tlachichilco
(MX:tpt:Tepehua, Tlachichilco)**

copyright © 2004 Wycliffe Bible Translators, Inc.

Language: Tepehua, Tlachichilco

Translation by: Wycliffe Bible Translators, Inc.

Tepehua, Tlachichilco [tpt], Mexico

Copyright Information

© 2004, Bible League International

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tepehua, Tlachichilco

© 2004, Bible League International

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
9bc3139d-0023-5d1b-901b-a143c1b0431c